

Nunalerinermik inuussutissarsiornerup siuarsarneqarnissaa pillugu Inatsisartut inatsisaat nr. 6, 2. december 2009-imeersoq

Kapitali 1

Inuussutissarsiutinut tapersiisarnermut siunertaq tunngaviusullu

§ 1. Inatsisikkut matumuuna siunertarineqarpoq Kalaallit Nunaanni nammineq pilersuilernissamut tapersiissutitut aammalu nunalerinermik inuussutissarsiut pimoorussiviusoq unammillersinnaassuseqartorlu siunissaq ungasinnerusoq isigalugu suliffissaqartitsisinnaasoq siuarsassallugu suliniutit inuiaqatigiit aningaasarsiornerannut pitsaasumik sunniuteqarsinnaasut atorlugit.

Imm. 2. Kapitalini 4 aamma 5-mi nalunaarneqarsimasutut inunnt ingerlatseqatigiinnulluunniit Kalaallit Nunaanni nunalerinermik ingerlatsisinnaatitaasunut Naalakkersuisut inuussutissarsiutit siuarsarniarlugit taarsigassarsisitsisinnaapput tapiissuteqarsinnaallutilluunniit.

Kapitali 2

Isumasiutit

§ 2. Oqaatsit “nunalerineq” imaluunniit “nunalerinermik inuussutissarsiorneq” inatsimmi matumani pineqartillugit Kalaallit Nunaanni nunaateqarnermut tunngatinneqartunut tamanut attuumatinneqarput, tassunga ingerlatsineq aamma uumasuutinik kinguaassioortitsinerit, orpinnik naatitsineq, naatitanik naatitsineq, uumasuutinut assigiinngitsunut ivikkanik nerukkaatissanik naatitsineq aamma uumasuutigisanit meqqunik, amernik, kukinnik il.il. atuilluaanerit ilanngullugit.

Kapitali 3

Inuussutissarsiutit siuarsarniarlugit taarsigassarsisitsinermit tapiissuteqartarnermilu pingaarnerusutigut tunngaviit

Pilersaarutit, inuussutissarsiutit siuarsarniarlugit taarsigassarsisitsiviusinnaasut

§ 3. Pilersaarutinut inuussutissarsiutit siuarsarniarlugit Naalakkersuisut taarsigassarsisitsisinnaapput

- 1) teknikkikkut illersorneqarsinnaasutut nalilerneqartunut
- 2) maanna siunissamiluunniit aningaasatigut akilersinnaasutut nalilerneqartunut, aamma
- 3) tassani pilersaarutigineqartunut aningaasartuutit iluanaarutissatut ilimagineqartunut naapertuutissangasorineqartunut.

Pilersaarutit tapiiffigineqarsinnaasut

§ 4. Naalakkersuisut pilersaarutinut makkununga tapiissuteqarsinnaapput

- 1) teknikkikkut illersorneqarsinnaasutut nalilerneqartunut,
- 2) tassunga peqatigitillugu maanna siunissamiluunniit inuiaqatigiit aningaasaqarniarneranni illersorniarneqarsinnaasunut,
- 3) tassunga peqatigitillugu tapiissutinik pissarsisumut imminut napatilernissamut periarfissaqartitsinissamut tapersiisinnaasunut.

Kapitali 4

Inuussutissarsiutit siuarsarniarlugit taarsigassarsinnaaneq pillugu aalajangersakkat sukumiinerusut

§ 5. Inuussutissarsiutit siuarsarniarlugit taarsigassarsiniartup qinnuteqaataata suliarinerani qinnuteqaat ataatsimut isigalugu naliliiffiginiarneqassaaq, ilaatigut matuma kinguliini pissutsit uppersarneqarsinnaanerani pingaartinneqassalluni:

- 1) Qinnuteqartup ilinniakkatigut piginnaasai, taakku ilimanarsisissagaat, qinnuteqartoq pisariaqartinneqartunik ingerlatsinissamut siulersuinissamullu piginnaasaqartoq, pilersaarummit inuussutissarsiutit siuarsarniarlugit taarsigassarsianik qinnuteqaateqarfigineqartumit aningaasatigut imminut akilersinnaasumik ingerlatsinissamut qularnaarneqarnissaanut.
- 2) Ingerlatsinermut- aamma akiliisinnaassuseqarnermut missingersuutit missingersuutinut naatsorsuutitallit, taakku ilimanarsisissagaat, inuussutissarsiutit siuarsarniarlugit taarsigassarsiap utertillugu akilersorneqarsinnaanera.
- 3) Qinnuteqartup aningaasaateqarneranut pissutsit pillugit takussutissiaq, tassunga ilanngullugit pisussaaffioreersut akilersorneqarsinnaaneranut atugassarititat, taakku ilimanarsisissagaat, inuussutissarsiutit siuarsarniarlugit taarsigassarsiap utertillugu akilersorneqarsinnaanera.
- 4) Nunaminertamik atugassanngortitsinermut aamma pisortatigoortumik akuersissutinut allanut akuersissutinullu pilersaarutip ingerlanneqarsinnaanerani pingaarutilinnut oqartussaasunit nalunaarutiginninnerit tunniunneqarsinnaapput inatsit manna naapertorlugu inuussutissarsiutit siuarsarniarlugit taarsigassarsisitsinermi.
- 5) Qinnuteqartumit pilersaarummik ingerlatsinissamut piumasaqaatinut allanut, inuussutissarsiutit siuarsarniarlugit taarsigassarsianik qinnuteqaateqarfigineqartunut naammassineqarsimasut.

Imm. 2. Imm.1, nr. 3 naapertorlugu naliliineq pissaaq qinnuteqartup piffissap qinnuteqarfiusup nalaani aningaasatigut inissisimanera tunngavigalugu. Pissutsit nangaassutigineqartut, taakkununga ilanngullugit sillimmasiinermit suliasamik aalajangiineq eqqartuussivilersuussinerit ilaalu ilanngullugit naliliinermut ilaatinneqartanngillat, pissutsit naammassineqarsimatinnagit.

Imm. 3. Naliliinissamut tunngavik Naalakkersuisunit ilaartorneqarsinnaavoq paasissutissanik piumasaqarlutik siusinnerusukkut Namminersorlutik Oqartussaninngaanniit inuussutissarsiummik attuumassuteqartunik taarsigassarsianik tapiissutinilluunniit pissarsisoqarsimanersoq, nalilerniarlugu qinnuteqartumit pisussaaffiit naammassineqarsimanersut.

Imm. 4. Qinnuteqartoq ataaseq taamaallaat nunaateqarfirmut ataatsimut inuussutissarsiutit siuarsarneqarnissaannut taarsigassarsiamik pissarsisinnaavoq.

§ 6. Naalakkersuisut nunaleriffimmik tunniussinermut atatillugu nunalerinermik piginnittunngortumut inuussutissarsiutit siuarsarnissaannut taarsigassarsititsisinnaapput

sanaartornermut imaluunniit illuummik qimatamik tigusinermut, imaattoqarsimappat

1) Nunalerinermik tigusinissaq pillugu piumasaqaatitaqanngitsumik

isumaqatigiissuteqartoqarsimappat illutalimmik, inuussutissarsiutigalugu illuutitalimmik, maskiinartalimmik aamma uumasortalimmik kiisalu piginnittunngortoq nunaminertamik atugassinneqarsimappat.

2) nunalerinermik tunniussisoq taassumalu qaniginerpaasamik ilaqutarisai illumi qimatami najugaqassappata, aamma

3) illu qimataq sanaartorneqassaaq, taarsigassarsiffigineqassalluni pigineqassallunilu nunalerinermik piginnittunngortumit.

§ 7. Tapiissutit § 15-imi taaneqartut saniatigut inuussutissarsiutigalugu illuutininik sananernut, alliliinermut imaluunniit illuutininik tigusinermut tunngappata, aningaasartuutit uppersarnarneqarsinnaasut 15%-iata annertoqqataani inuussutissarsiutigalugu siuarsaanermut taarsigassarsititsisoqarsinnaavoq.

§ 8. Inuussutissarsiummik siuarsaaniarluni taarsigassarsiasat tunniunneqartartut § 6 aamma § 7 naapertorlugit tunniunneqarpata, taakkununga ilanngullugit innaallagissamut ikkussuinerni aningaasartuutit, toqqavissamik sananermut sulisartunut aningaasartuutit aamma illuliornermut atatillugu aningaasartuutit allat, kiisalu teknikkimut, inatsisilerinermut aningaasaqarnermullu siunnersorteqarnermut ilaatinneqassapput.

Imm. 2. Inuussutissarsiutit siuarsarniarlugit taarsigassarsiasutit tunniunneqartarput tunuliaqutaatillugu nunalerinermik pioreersumik tigusinermi, tassunga ilanngullugit inuussutissarsiornermi illuutit, maskiinat, uumasuutit, illuutit najugarisat aamma ingerlatsinermut atortorissaarutit allat kiisalu teknikkikkut, inatsisilerinertigut pisinermullu tunngatillugu aningaasaqarnermut siunnersortinnermullu.

Imm. 3. Inuussutissarsiutit siuarsarniarlugit taarsigassarsiasat tunniunneqartarput taamaallaat pisiarinerani nalingata annertussusaa, imm. 1 aamma 2-mi nalinginnaasutut isigineqartoq naapertorlugu.

Ingerlatsinermi atortut atortullu allat

§ 9. Naalakkersuisut inuussutissarsiutit siuarsarnissaannut tapiissutinik tunniussisinnaapput:

1) Maskiinanut, atortussanut, imerterutissanut, ungaluliassanut kiisalu ingerlatsinermut atortussanut allanut pisariaqartinneqartunut pissarsinermi.

2) Innaallagissiornermut atortuninik sananermut pissarsinermulluunniit, tassunga ilanngullugit erngup nukinganik innaallagissiorfeqqat, anorisaatit aamma seqerngup qinngorneranit nukissiuutit nunalerinermi siunertamut, illuutininik aamma illumut qimatamut atugassanik.

3) Umiatsiaaqqamik inunnik angallassissutissamik pissarsinermut.

Uumasuutit kinguaassioritit

§ 10. Naalakkersuisut uumasuutinik kinguaassiorititassanik pisisoqartillugu inuussutissarsiutit siuarsarniarlugit taarsigassarsisitsisinnaapput imatut pisoqarpat:

1) Tamatumuuna uumasuutit tamarmiusut immikkut ittumik malunnaatilimmillu

amerlisinneqassappata.

2) Umasuutiniq kinguaassiortitassanik pissarsineq uumasuutigineqareersunik nappaalanikkut aamma silap pissusaatigut assigisaannilluunniit pissuteqartumik annertuumik annaasaqarnermik pissuteqarpat, imaluunniit

3) Nunalerinermik ingerlatsivimmik pioreersumi aallartitseqqittoqarpat.

Iluarsaassinerit

§ 11. Pigisat nalillit §§ 6, 8 aamma 9-mi taaneqartut iluarsaanneqarnerannut Naalackersuisut inuussutissarsiutit siuarsarniarlugit taarsigassarsisisinnaapput, iluarsaassinerit nunalerinerup ingerlateqqinneqarnissaanut annertuumik pingaaruteqarpata aammalu nalinginnaasumik naatsorsuutigisamillu iluarsaassilluni aningaasartuutit qaffasinneruppata.

Kapitali 5

Tapiissutit pillugit aalajangersakkat sukumiinerusut

§ 12. Nunalerinermut atatillugu taamaallaat nunagissaanermik sulianut aamma inuussutissarsiornermik illuutiniq sananermut tigusinermulluunniit tapiissuteqartoqarsinnaavoq. Qinnuteqartoq nunagissaanermik sulianut aamma inuussutissarsiornermik illuutiniq sananermut tigusinermulluunniit tapiiffigineqarsinnaassaguni

1) ukiut 21-it 65-illu akornanni ukioqartariaqarpoq,

2) nunalerinermik pioreersumik ingerlatsisuusaaq,

3) uppersarsinnaassallugit, nunagissaanermik suliaq imaluunniit inuussutissarsiutitigut illuutigisaaq nunalerinermut siursaataallunilu pimoorussinerulersitsissutaanersoq, aamma

4) uppersarsinnaassallugit nunagissaanermik suliaq imaluunniit inuussutissarsiutitigut illuutigisaaq nunalerinermik ingerlatsinermut aningaasaqarniarnikkut pitsaasumik kinguneqassanersoq.

Nunagissaanermi suliat

§ 13. Naalackersuisut naggorissaanermut iluarsaassinernut nutaanut, nunagissaanermut, kussiniliornermut, kalkilersuinermut, naggorissaatilersuinermut kiisalu narsaatini aqquserniornernut nunaminertani suliarineqartunut tapiissuteqarsinnaapput, atuinermut piginnittuuneq nunalerinermik ingerlatalimmut tunniunneqarsimappat.

Imm. 2. Nunaminertap suliarineqarsimasup annertussusia suliallu suunera tunngavigalugit tapiissuteqartoqassaaq, suliarlu naammassineqartoq uppersarsarneqarpat tunniunneqassallutik.

Imm. 3. §§ 4 aamma 12-mi piumasaqaatit naliliinermilu piumasarineqartut naapertorlugit nunagissaanermi sulianut tapiissutit tunniunneqassapput.

Imm. 4 . Nunagissaanermik suliamut tapiissutit aatsaat tunniunneqarsinnaapput Nunalerinermut Siunnersuisoqarfiup nunalerinermik suliaq naliliiffigereerpagu.

§ 14. Naalakkersuisut nunalerinermi siunertanut tapiissuteqarsinnaapput nammineerluni illuliamik ataatsimik sanaartornermut tigusinermulluunniit piginnuttumut, atuisumut pisortaasumut ikiortaasumulluunniit.

Imm. 2. Imm.1 naapertorlugu tapiissutit nammineerluni sanaartornermut atortussanut atorneqartussanut aningaasartuutit uppersarsarneqartut amerlanerpaamik 95 %-iinut tapiissutit tunniunneqarsinnaapput.

§ 15. Naalakkersuisut nunalerinermi ingerlatamut ataatsimut tapiissuteqarsinnaapput inuussutissarsiutigalugu illuummik sananermut alliliinermut imaluunniit tigusinermut.

Imm. 2. Imm.1 naapertorlugu tapiissutit, inuussutissarsiutigalugu illuutitut atortussanut atorneqartussanut aningaasartuutit uppersarsarneqartut amerlanerpaamik 75 %-ii tapiissutitut tunniunneqarsinnaapput.

Iluarsaassinerit

§ 16. Pigisat nalillit § 14 aamma § 15-imi taaneqartut iluarsaanneqarnerannut Naalakkersuisut tapiissuteqarsinnaapput, iluarsaassinerit nunalerinerup ingerlateqqinneqarnissaanut annertuumik pingaaruteqarpata aammalu nalinginnaasumik naatsorsuutigisamillu iluarsaassilluni aningaasartuutit qaffasinneruppata.

Kapitali 6

Ingerlatsinermut aningaasartuutitut taarsigassarsineq pillugu aalajangersakkat sukumiinerusut

§ 17. Naalakkersuisut nunalerinermik ingerlatsisumut aalajangersimasumik ernialersukkanik ingerlatsinermut aningaasartuutitut taarsigassarsianik atorsinnaasanik atugassanngortitsisinnaapput, uumasunut nerukkaatissanut, naatsiiassanut, naggorissaatitut assigisaannullu aningaasartuutitut matussutissanik. Ilanngullugit pisiat annikitsut aamma aserfallatsaaliinerit annikinnerusut ingerlatsinermut aningaasartuutitut taarsigassarsianit matussuserneqarsinnaapput. Taarsigassarsisitsinerup annertussusaa uppersarsaatitut takussutissiinermik tunngaveqassaaq.

Imm. 2. Naalakkersuisut pissutsini immikkut ittuni akuerisinnaavaat imm. 1-mi eqqaaneqartunit allanut ingerlatsinermut aningaasartuutitut taarsigassarsianit akiligassanut allanut atuneq, aningaasartuutit taakku akilerneqarnissaat kinguartinneqarsinnaanngippat imaluunniit pisariaqartillugu illersortariaqartitsinermi taakkulu nunalerinermik ingerlatsinermut tunngasuuppata.

Imm. 3. Naalakkersuisut ingerlatsinermut aningaasartuutitut taarsigassarsianut taakkununga ilanngullugit ingerlatsinermut akiligassarsiat annertussusaannut, akilersuinissamullu tunngasunut aamma ernialersuinerup malittarisassanik aalajangersaasinnaapput.

Kapitali 7

Inuussutissarsiutit siuarsarniarlugit taarsigassarsinermut atugassarititaasut

Akilersuineq

§ 18. Inuussutissarsiummik siuarsaaniarluni taarsigassarsiat aalajangersimasumik annertussusilikkatut ernialersukkatut taarsigassiissutigineqassapput akilersorneqassallutillu.

Imm. 2. Naalackersuisut inuussutissarsiummik siuarsaaniarluni taarsigassarsianut akilersuinissamut taarsigassarsisup inuussutissarsiummik siuarsaaniarluni taarsigassarsianik akileraaneranut peqatigitillugu tapiissutinik tunniussisinnaapput. Ernianut akilersuinissami tapiissutinik tunniussisoqarsinnaangilaq.

Imm. 3. Naalackersuisut tapiissutinik qaffaasinnaapput, nunalerinermik ingerlatsivinnik piginnittut arlallit illuutinik, maskiinanik allanillu ataatsimoortumik atugassanik pissarsissappata.

Imm. 4. Naalackersuisut tapiissutissat amerlassusissaat aalajangersassavaat inuussutissarsiummik siuarsaaniarluni taarsigassarsianut piffissaq akilersuiffiusoq najoqqutaralugu. Inuussutissarsiuutit siuarsarniarlugit taarsigassarsiat akilersornerini akilersuutip 75 %-ia angullugu tapiisoqarsinnaavoq. Tapiineq taanna pisinnaavoq taarsigassarsisitsinermut isumaqatigiissut malillugu aalajangersimasumik ikilisaalluni akiligassaq taarsigassarsisumit akilerneqarsimappat.

Imm. 5. Nunalerisutut nutaamik pilersitsinermut atatillugu Naalackersuisut inuussutissarsiummik siuarsaaniarluni taarsigassarsianut tapiissutit imm. 4-mi taaneqartumit procentimit aalajangersarneqarsimasumut qaffasinnerusumut tapiissutit aalajangersarsinnaavaat. Aalajangersagaq atuutinngilaq, taarsigassarsisup nunalerinermik ingerlatsiviup ilaanik pissarsippat, taarsigassarsisup piginneqataaffigeriigaanik.

Imm. 6. Naalackersuisut inuussutissarsiuutit siuarsarniarlugit taarsigassarsiat taarsersornerannut tapiissutit amerlassusissaat atugassarititaasullu allat pillugit malittarisassanik aalajangersaasinnaapput.

Nammineq aningaasaliissutit

§ 19. Naalackersuisut inuussutissarsiuutit siuarsarniarlugit taarsigassarsiamik taarsigassarsititsisinnaapput qinnuteqartoq nammineq aningaasaliissuteqassasoq piumasaqaatigalugu.

Imm. 2. Nammineq aningaasaliissutit pissarsinermi aningaasat ikinnerpaamik 10%-erissavaat Naalackersuisunullu akilerneqarsimassallutik inuussutissarsiuutit siuarsarniarlugit taarsigassarsiat tunniunneqannginnerini.

Imm. 3. Inuussutissarsiuutit siuarsarniarlugit taarsigassarsiat § 6 – 10 naapertorlugit tunniunneqartuni nammineq aningaasaliissutit tassaasinnaapput pigisamik nalilimmik pissarsiariniakkap tamarmiusup nalinganut ilaasoq.

Imm. 4. Nunalerisunngornermut atatillugu §§ 6 – 11-milu aalajangersakkat naapertorlugit inuussutissarsiuutit siuarsarniarlugit tapiissuteqartoqarsinnaavoq taamaalilluni nammineq aningaasaliissutit 5 %-imut aalajangersarneqarlutik.

Imm. 5. Imm.4. naapertorlugu aningaasaliissutinut tunngasunik amerlanerusunik taarsigassarsiat taamaallaat aningaasaliissutini atorneqarsinnaapput, taarsigassarsisup nunalerisunngorneranut atatillugu ukiunut pingasunut siullernut aningaasaliissutissatut Naalackersuisunit akuerineqarsi-

masumik pilersaarummut ilaatinneqarpata.

Imm. 6. Nammineq aningaasaliissutit amerlanerusut pillugit Naalakkersuisut malittarisassiorsinnaapput.

Piffissaq atuuffiusoq

§ 20. § 7 naapertorlugu inuussutissarsiutit siuarsarniarlugit taarsigassarsianut atatillugu piffissaq atuuffiusoq, amerlanerpaamik ukiunut 25-nut sivisussuseqarpoq. § 9 naapertorlugu inuussutissarsiutit siuarsarniarlugit taarsigassarsianut atatillugu piffissaq atuuffiusoq, amerlanerpaamik ukiunut 10-nut sivisussuseqarpoq.

Imm. 2. Siullermeerluni inuussutissarsiutit siuarsarniarlugit taarsigassarsianut akiliinissaq ukiut marluk angullugit kinguartinneqarsinnaavoq, taamaalilluni piffissaq atuuffiusoq ukiunik marlunnik sivitsonerarluni.

Imm. 3. § 10 naapertorlugu inuussutissarsiutit siuarsarniarlugit taarsigassarsianut atatillugu piffissaq akilersuiffiusussa, sivisunerpaamik ukiunut 5-inut sivisussuseqarpoq.

Imm. 4. § 11 naapertorlugu inuussutissarsiutit siuarsarniarlugit taarsigassarsianut atatillugu piffissaq atuuffiusoq, pigisat nalillit iluarsaanniarlugit taarsigassarsissutigineqartunut, taarsigassarsianut tamanut atuuttutulli piffissamut akilersuiffissamut naapertuuttumik sivisussuseqarpoq, taamaattorli innaallagissamut atortulersuutinut atatillugu inuussutissarsiutit siuarsarniarlugit taarsigassarsianut atatillugu sivisunerpaamik ukiunut 10-nut.

Qularnaveeqqusiineq

§ 21. Illuutinut inuussutissarsiutit siuarsarniarlugit taarsigassarsiat tamatigut uppernarsaammik qularnaveeqquserneqartassapput. Uppernarsaammik qularnaveeqqutit pitsaanerpaamik pingaartinneqartassapput.

Imm. 2. Inuussutissarsiutit siuarsarniarlugit taarsigassarsiat sapinngisamik pitsaanerpaamik qularnaveeqquserneqarsimassapput, inuussutissarsiutit siuarsarniarlugit taarsigassarsisitsiviusumut pigisamut nalilimmut uppernarsaatilimmik qularnaveeqqusiinikkulluunniit.

Inuussutissarsiutit siuarsarniarlugit taarsigassarsinermi akilersuutinullu tapiissuteqarfigineqarnermi atugassarititaasut

§ 22. Inuussutissarsiutit siuarsarniarlugit taarsigassarsiat ernialerneqartassapput akilersorneqarlutillu malittarisassat Naalakkersuisunit aalajangersakkat naapertorlugit. Taarsigassarsiat naafferartumik tunniunneqarsinnaapput.

Imm. 2. Naalakkersuisut inuussutissarsiutit siuarsarniarlugit taarsigassarsiat tamakkerlugit akilerneqarnissaat piumasaqaatigisinnaavaat, erniaat akilersuutilluunniit piffissaagallartillugu akilerneqanngippata imaluunniit inuussutissarsiutit siuarsarniarlugit taarsigassarsianut atatillugu piumasaqaatit

eqquutsinneqanngippata.

Imm. 3. Inuussutissarsiutit siuarsarniarlugit taarsigassarsianik akilersuinerit ulloq akiliiffissaq eqqorlugu akilerneqarsimasarput ullup akiliiffiusussap kingorna kingusinnerpaamik ullut 30-it qaangiunnerini akilerneqarsimappata. Tamatuma kingorna inuussutissarsiutit siuarsarniarlugit taarsigassarsiat tamakkerlutik akilerneqartussanngorsimasarput taarsigassarsisoq ernianut akilersuutinullu allakkatigut akileeqqusilluni peqqussutip nassiunneqarnerata saqqummiunneqarnerataluunniit kingorna kingusinnerpaamik ullut arfineq marluk qaangiunnerini akiliisimangippat.

Imm. 4. Naalackersuisut taarsigassarsisup piffissami aalajangersimasumi akiliinissaa ukiut marluk tikillugit kinguartissinnaavaat imaattoqarsimappat:

1) Inuussutissarsiutit siuarsarniarlugit taarsigassarsiat tamarmiusut nalingisa qularnaveeqqusiussap nalingata 60%-iat sinnerlugu annertussuseqartutut nalilerneqarpat, aamma

2) Isumaqartoqarpat akiliisinnaanngikkallarnek utaqqiisaagallaannartutut isikkoqartoq.

Imm. 5. Taarsigassarsiallip imm.4 naapertorlugu akilersuinerimik kinguartitsinerup kingornatigut piffissami aalajangersimasumi akiligassanik akilersuinini aallarteqqippagu, piffissaq akilersuiffiususaaq piffissat aalajangersimasut kinguartitsivigineqarsimasut amerlaqataannik sivitsorneqassaaq.

Imm. 6. Ukiunit marlunnit amerlanerusunik akilersuinissamik sivitsuisinnaanermik Naalackersuisut immikkut ittunik pisoqartillugu akuersisinnaapput.

Kapitali 8

Inuussutissarsiutigalugit illuutit aamma nammineerluni illuliap ataatsip sananeqarnerinut tiguneqarnerinulluunniit tapiissutit utertillugit akilersuinerit.

§ 23. Naalackersuisut piginnittumut, atuisumut, ingerlatsisumut ikiortimulluunniit inuussutissarsiutigalugit illuutit aamma nammineerluni illuliat sananeqarnerinut tiguneqarnerinulluunniit tapiissutit utertillugit akileqqusinnaavaat imaattoqarsimappat:

1) Tapiissutinik pissarsisoq ukiuni marlunni imminnut maliinnartuni nunalerisutut inuussutissarsiuteqarsimangippat.

2) Tapiissutinik pissarsinerminngaanniit piffissami ukiut qulit iluini nammineerluni illuliaq tunineqarsimappat.

3) Tapiissutinik pissarsisup nunalerinermik ingerlatsinerimut imaluunniit oqartussaasunit allanit nunalerinermut pineqartumut akuersissummut piumasaqaatinik naammassinnissinnaajunnaarpat, imaluunniit

4) Tapiissutinik tunniussinerimi piumasaqaatit atugassarititaasunillu allanik eqquutsitsinngippat.

§ 24. Taarsigassarsianut tamarmiusunut tapiissutit ukiut 33-it ingerlanerini ukiumut 3 %-imik nalikillilerneqartassapput ukiumili kingullermi 4 %-imik.

Imm. 2. § 23 naapertorlugu tapiissutinik utertitsilluni akilersuinerimi, utertitsilluni akilersuinissamut piumasaqaat naatsorsorneqassaaq tapiissutip pissarsiarineqartalernerinngaanniit ukiuni aallartittuni

tamani tapiissutitut 1/33-mik nalikillilerneqarsimasutut.

Tunniussineq

§ 25. § 26 naapertorlugu inuussutissarsiutigalugu illuutininik nammineerlunilu illuliamik tunniussineq taamaallaat Naalakkersuisunut pisinnaavoq, imaluunniit Naalakkersuisunit pisisussatut akuerineqartumut, Naalakkersuisunit akuerineqarsimasunik piumasaqaatitalerlugu.

Imm. 2. Tapiissutinik pissarsisup toquneratigut tapiissutinik pissarsisup katissimallugu aapparisa kingornussisussaaluunniit piginnaatitaapput tapiissutit eqqarsaatigalugit tapiissutinik tiguisup piginnaatitaaffinik pisussaaffinillu tigusinissamut.

§ 26. Tapiissutit nalikillilerneqarnissaasa tungaannut Naalakkersuisut pisussaaffeqarput tapiissutinik pissarsisup qinnutigippagu inuussutissarsiutigalugu illuutip nammineerluniluunniit illuliap tiguneqarnissaannut.

§ 27. Inatsit manna malillugu tapiissutit tunniunneqartut taamaallaat, nunalerisumut ataatsimut ataasiartumik tapiissutigineqarsinnaapput.

Kapitali 9

Inuussutissarsiutit siuarsarneqarnissaannut taarsigassarsianut akiitsunik nalikilliliineq isumakkeerinninnerlu pillugit

Ernianik naatsorsuinerup aamma akiitsunik nalikilliliinerup taamaatinneqarnerat

§ 28. Inuussutissarsiutit siuarsarneqarnissaannut taarsigassarsianik ernialersuineq taamaattarpoq, Naalakkersuisut inuussutissarsiutit siuarsarneqarnissaannut taarsigassarsiamik eqquutsitsinnginneq pissutigalugu taamaatitsippata.

Imm. 2. Inuussutissarsiutit siuarsarneqarnissaannut taarsigassarsiat eqquutsitsinnginneq pissutigalugu taamaatinneqarpata nunaallu taarsigassarsisumit pigineqarunnaarluni, Naalakkersuisut ukiumoortumik akiitsut annikillisinniarlugit tapiissuteqarsinnapput taarsigassarsisup qaammatit 12-it siuliini aningaasat akilersimasaasa amerlaqataannik.

Isumakkeerinninneq

§ 29. Inatsisip matuma imaluunniit inuussutissarsiutinut tapersiisarneq pillugu malittarisassat siusinnerusukkut atuuttut malillugit taarsigassarsiat eqquutsitsinnginneq pissutigalugu taamaatinneqarsimatillugit taarsigassarsiat ukiup qaammatisiuteqarfiusup naaneraniit ukiut tallimat qaangiunnerini Naalakkersuisut akiligassat ilaat isumakkeerinnissutigisinnaavaat. Inuussutissarsiutit siuarsarneqarnissaannut taarsigassarsiat ilaannakuusumik isumakkeerneqarsinnaanngillat taamaasilluni akiitsut 150.000 koruuninit ikinninngorteqqunagit.

Imm. 2. Naalakkersuisut taamaallaat inuussutissarsiutit siuarsarneqarnissaannut taarsigassarsianik isumakkeerinnissinnaapput naatsorsuutigineqarpat taarsigassarsiallip akiligassat tamakkerlugit ukiuni

qaninnerni tamakkiisumik utertillugit akilersorsinnaassanngikkai.

Imm. 3. Imm. 2 naapertorlugu taarsigassarsiallip akiliisinnaassuseqarnera makku tunngavigalugit nalilerneqassaaq

- 1) akiitsut amerlassusiat.
- 2) taarsigassarsisup inoqutaasalu qanoq aningaasaateqartiginerat.
- 3) taarsigassarsisup inoqutaasalu maannakkut siunissamilu isertitaqarnerat, aamma
- 4) taarsigassarsiallip qassinik ukioqarnera.

Imm. 4. Naalackersuisut imm. 1 apeqqutaatinnagu inuussutissarsiutit siuarsarniarlugit taarsigassarsiat tamakkerlugit ukiut qulit qaangiutereersut inuussutissarsiutit siuarsarniarlugit taarsigassarsiat atorunnaarsinneqarnerisa kingorna isumakkeerinnissutigisinnaavaat, imaassimappat taarsigassarsisup inuussutissarsiutit siuarsarniarlugit taarsigassarsiamik ima annertutigisumik akilersimagaai, taarsigassarsisup akilersuinissaminut periarfissaanut sanilliullugit naatsorsuutigineqarsinnaasutut.

Imm. 5. Inunnut ataasiakkaanut taamaallaat isumakkeerinnittoqarsinnaavoq.

Taarsigassarsianik allanngortitsineq

§ 30. Naalackersuisut inuussutissarsiutit siuarsarniarlugit taarsigassarsiat allanngortissinnaavaat inatsit manna naapertorlugu imaluunniit siornatigut inuussutissarsiutinut tapersiisarnernut malittarisassat atuuttut naapertorlugit tunniunneqarsimasut, inuussutissarsiutit siuarsarniarlugit taarsigassarsianngorlugit nutaat imatut sivisussusilerlugit pigisanut naatsorsuutigisamik qanoq sivisutigisumik piusinnaanerat sinnernagu, imaattoqarpat

- 1) inuussutissarsiutit siuarsarniarlugit taarsigassarsiasut ukiut tallimat sinnerlugit pioreersimappata, aamma
- 2) naatsorsuutigineqarpat taarsigassarsisup nutaamik inuussutissarsiutit siuarsarniarlugit taarsigassarsianik akilersuisinnaanissaa.

Akiligassallit nikinnerat

§ 31. Naalackersuisut akuersissutigisinnaavaat inuussutissarsiutit siuarsarniarlugit taarsigassarsiat inatsit manna naapertorlugu imaluunniit inuussutissarsiutinut tapersiisarneq pillugu siusinnerusukkut malittarisassat atuuttut naapertorlugit tunniunneqarsimasut, taarsigassarsisumut nutaamut tunniunneqarsinnaasut, pigisat inuussutissarsiutit siuarsarniarlugit taarsigassarsissunneqarsimasut peqatigitillugit taarsigassarsisumut nutaamut tunniunneqassasut aamma taarsigassarsisumit nutaamit inuussutissarsiutit siuarsarniarlugit taarsigassarsianik pissarsinissamut piumasaqaatit naammassineqarsimappata.

Kapitali 10

Ataatsimoorussamik aalajangersakkat

§ 32. Inuussutissarsiutit siuarsarniarlugit taarsigassarsisitsineq taamaatinniarlugu aamma tapiissutinik akiliuteqaqqusillutik Naalackersuisut aalajangiisinnaapput, inuit

ingerlatseqatigiiffiilluunniit tunngavissaqanngitsumik inatsit manna iluaqutigalugu taarsigassarsianik tapiissutinilluunniit pissarsisimappata.

Imm. 2. Taarsersugassanut aamma tapiissutitut pissarsisut aningaasatigut pissutsini annertuunik allangortoqarsimatillugu imaluunniit paasissutissanik piumasaqarnermi peqqussinernut atatillugu saqqummiussaqaqannginnerni Naalackersuisut ilisimatinneqaqanngippata, pissuseq tamanna pillugu sumiginnaasoqarsimasutut isigineqassaaq.

§ 33. Naalackersuisut inatsisip matuma ingerlanneqarnera pillugu malittarisassiorsinnaapput taakkununga ilanngullugit makku pillugit malittarisassat:

1) Inuussutissarsiutit iluarsartuullugillu pilersaarusiit sorliit inuussutissarsiutit siuarsarniarlugit taarsigassarsianik tunineqartassappat.

2) Nunap ilaani sumiiffiit sorliit pilersaarutillu inuussutissarsiutit siuarsarniarlugit taarsigassarsiani tunineqartassappat.

3) Inuussutissarsiutit siuarsarniarlugit taarsigassarsiat akilersornerinut tapiissutit.

4) Ilinniartitaanermut, aningaasaqarnermut teknikkimullu tunngasutigut qinnuteqaateqartunut pilersaarutinullu piumasaqaatit.

5) Nunagissaanermik sulianut inuussutissarsiutigalugu illuutitut tapiissutitut piumasaqaatit.

6) Ingerlatsinermut aningaasartuutitut taarsigassarsititsisarneq.

7) Peqqussutit matuma allaffissornikkut ingerlanneqarnera, taassumalu ataani kommunit kiisalu Nunalerinermi Siunnersortit aamma Savaatillit Peqatigiissut Peqatigiiffiata, SPS-ip peqataasarnerat.

Ikaarsaariarnermi atortuulersitsinermilu aalajangersakkat

§ 34. Inatsit manna atuutilissaaq 1. januar 2010.

Imm. 2. Peqatigitillugu aalisarnermut, piniarnermut nunalerinermullu tapiissutit pillugit inatsisartut peqqussutaat nr. 10, 12. november 2001-imeersoq kiisalu aalisarnermut, piniarnermut nunalerinermullu tapiissutit pillugit inatsisartut peqqussutaat nr. 11, 20. november 2006-meersoq aalisarnermut, piniarnermut nunalerinermullu tapiissutit pillugit allanguinermut inatsisartut peqqussutaat atorunnaarsinneqarput.

Imm. 3. Namminersornerullutik Oqartussat nalunaarutaat nr. 12, 12. december 1984-imeersoq inuussutissarsiutinik tapersiisarneq pillugu atuutiinnassaaq, inatsit manna allaluunniit naapertorlugit malittarisassatigut taarserneqarnissami atorunnaarsinneqarnissamiluunniit tungaanut imaluunniit Inatsisartut peqqussutaatigut allanit.

Imm. 4. Piumasaqaatit Inatsisartut peqqussutaat nr. 4, 20. november 1984-meersoq inuussutissarsiutinut tapiisarneq naapertorlugu aamma Inatsisartut peqqussutaat nr. 10, 12. november 2001-meersoq aalisarnermut, piniarnermut nunalerinermullu tapiisarneq tunngasoq kiisalu aalisarnermut, piniarnermut nunalerinermullu tapiisarneq pillugu inatsisartut peqqussutaata allangortinneqarneranik inatsisartut peqqussutaat nr. 11, 20. november 2006-imeersoq aamma naapertorlugu suli piusut allaffissornikkut aqunneqartuarallassapput tapiissutit aamma taarsigassarsitsinerit pilersinneqarnerini aalajangersakkat atuuttut naapertorlugit.

Namminersorlutik Oqartussat, ulloq 2. december 2009

Kuupik Kleist

/

Ane Hansen